

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 225175 24 St
Zenica, 04.07.2025. godine

Općinski sud u Zenici, stečajni sudija Amela Sinanović, u prethodnom postupku za utvrđivanje uvjeta za otvaranje stečajnog postupka nad imovnom stečajnog dužnika MMF d.o.o. Kakanj, Bićer bb, Kakanj, na ročištu za utvrđivanje uvjeta za otvaranje stečajnog postupka održanom u prisustvu privremenog stečajnog upravnika Sunalahpašić Samira, zastupnika po zakonu stečajnog dužnika direktora Pačariz Armina, i punomoćnika Federalno ministarstvo finansija, Porezna uprava FBiH, Kantonalni porezni ured Zenica, Sarajlić Asafa, zaposlenika, dana 04.07.2025.godine, donio je sljedeće:

R J E Š E N J E

Pozivaju se povjerioci i zainteresirana lica da u roku od 30 dana od dana objavljivanja poziva uplate predujam za obezbijedenje troškova stečajnog postupka u iznosu od 6.000,00 KM, na depozitni račun ovoga suda broj: 134-010-0000044837 otvoren kod ASA Banke d. d. Sarajevo, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko povjerioci i zainteresirane osobe ne predujme iznos naveden u stavu jedan ovog rješenja u određenom roku u ovom rješenju, upozoravaju se da će stečajni sudija otvoriti stečajni postupak i odmah zaključiti postupak nad društvom MMF d.o.o. Kakanj, Bićer bb, Kakanj te naložiti brisanje ovog društva iz sudskog registra.

Ako zainteresirana osoba predloži otvaranje stečajnog postupka i uplati predujam u navedenom roku stečajni sudija će otvoriti stečajni postupak i voditi ga u skladu sa odredbama Zakona o stečaju.

O b r a z l o ž e n j e

Rješenjem ovog suda broj 43 0 St 251175 24 St od 14.01.2025.godine pokrenut je prethodni postupak radi utvrđivanja uvjeta za otvaranje stečajnog postupka nad imovinom stečajnog dužnika MMF d.o.o. Kakanj, Bićer bb, Kakanj, a za privremenog stečajnog upravnika imenovan je Sunulahpašić Samir iz Busovače, ul. Zagrebačka bb.

Na ročištu za ispitivanje uvjeta za otvaranje stečajnog postupka privremeni stečajni upravnik je ostao kod svog pismenog izvještaja od 10.02.2025.godine, kao i Dopunskog izvještaja od 01.07.2025.g, te je istakao da prema pregledu podataka iz javnog registra, odnosno prema Uvjeranju izdato od strane Općinskog suda u Kaknju, Odjeljenje za Zemljišnoknjižne poslove broj:036-0-RZ-24-000 576 od 16.07.2024.godine, društvo MMF d.o.o. Kakanj, Bićer bb, Kakanj nije upisano kao vlasnik-suvlasnik nekretnina-stana. Prema Uvjeranju izdato od strane MUP-a Zenica, Odsjek za administraciju Kakanj, broj: 08-01-02/11-03-7-244/24 od dana 11.07.2024.godine utvrđeno je da je firma MMF d.o.o. Kakanj, Bićer bb, Kakanj prema službenim evidencijama vlasnik motornih vozila: teretnog motornog vozila marke Citroen, tip vozila Z, model vozila Jumper, broj šasije: VF7ZCPMNC17403916, registarskih tablica J41T167, zadnja registracija važila do 12.02.2019.godine i teretnog motornog vozila marke Daimler-Benz, tip vozila 817, model vozila -, broj šasije: WDB67600215306684, registarskih tablica: M09T067, objavljeno 25.12.2019.godine, razlog objave – objava po službenoj

dužnosti. U izjavi koju je g-din Armin Pačariz dao dana 06.02.2025. i ovjerio kod notara Elze Dilber iz Zenice pod brojem 1579/2025 godine vezano za gore navedena vozila izjavio je da su vozila prodana kao sekundarna sirovina, a da je novac od prodaje utrošen u redovne poslovne aktivnosti. Uz svoju izjavu priložio je kao dokaz i Kupovni list br: 98/14 od 10.01.2020.godine izdat od strane Obrtničke radnje „PINGO“ Kakanj koja se bavi otkupom sekundarnih sirovina. Vezano za imovinu društva, direktor Armin Pačariz, direktor privrednog društva pod punom moralnom i krivičnom odgovornošću dao je dvije izjave. U izjavi koja je ovjerena u Općini Kakanj dana 04.12.2024.godine izjavio je slijedeće: „da privredno društvo MMF d.o.o. Kakanj, ul. Bičer bb, Kakanj nema u svom vlasništvu nekretnine, pokretnine, zalihe, naplativa potraživanja, osnivačke uloge u drugim pravnim licima, novčanih sredstava u blagajni društva niti ima bilo koju drugu imovinu koja bi bila u vlasništvu društva i predmet stečajne mase. Također je istom izjavio i „da društvo ne obavlja poslovnu aktivnost već duži niz godina i ne ostvaruje prihode i rashode kao i dobit društva, a da je posljednji godišnji obračun urađen za 2020.godinu te da od te godine društvo nije predavalo zvanične finansijske izvještaje ovlaštenim Agencijama, pa se tako nismo mogli uvjeriti u knjigovodstveno stanje imovine, obaveza i kapitala firme. U izjavi koja je ovjerena kod Notara Elze Dilber iz Zenice dana 06.02.2025.godine pod brojem 1580/2025 izjavio je slijedeće: „izjavljujem da privredno društvo „MMF “ d.o.o Kakanj nema u svom vlasništvu nekretnine, pokretnine, zalihe, naplativa potraživanja, osnivačke uloge u drugim pravnim licima, novčanih sredstava u blagajni društva niti bilo koju drugu imovinu koja bi bila u vlasništvu društva.....“. Na osnovu Izvještaja izdatog od strane Centralne banke Bosne i Hercegovine o računima poslovnog subjekta od dana 26.09.2024.godine firma MMF d.o.o. Kakanj ima registrovan samo jedan transakcijski račun koji je blokiran od 07.06.2019.godine i to 3385902205860869, otvoren kod Unicredit bank dd BIH-blokiran od dana 07.06.2019.godine. Kako su transakcijski računi blokirani od 07.06.2019.godine neprekidno 60 dana i duže, a prijedlog za otvaranje stečaja je podnesen od strane zakonskog zastupnika, može se konstatovati da organ ovlašten za otvaranje stečajnog postupka nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti kada je to bio dužan da podnese stečajni dužnik, odnosno organ ovlašten za zastupanje stečajnog dužnika. Privremeni stečajni upravnik procjenjuje da se poslovanje stečajnog dužnika u zatečenom organizaciono-funkcionalnom obliku ne može nastaviti, jer društvo ne radi već duži niz godina. Kao privremeni stečajni upravnik izvršio je uvid u analitički bruto bilans za 2020 godinu u stavkama 211-kupci u zemlji i 238-ostala kratkoročna potraživanja evidentiran je novčani zbirni iznos od 1.291.428,89 KM, a što odgovara i bilanci stanja za 2020 godinu. Kupci u zemlji-konto 211 iznose u zbirnom iznosu od 710.101,83 KM, a konto 238-ostala kratkoročna potraživanja iznose u zbirnom iznosu od 581.327,06 KM. Među najvećim potraživanjima na kontu 211-kupci su Rudnik Bila Travnik u iznosu od 518.533,57 KM i kupac Lančanik d.o.o. Kakanj u iznosu od 118.947,91 KM. Detaljnim pregledom analitičkog bruto bilanca za 2020 godinu uvidio sam da i na kontu 432-Dobavljači u zemlji, su evidentirane i obaveze prema Dobavljaču Rudnik Bila Travnik u iznosu od 560.972,75 KM. Da se izvršila kompenzacija dugovanja i obaveza dug društva MMF d.o.o. Kakanj prema dobavljaču Rudnik Bila Travnik bi iznosio 42.439,18 KM i u tom slučaju ne bi bilo nikakvih potraživanja od kupca Rudnik Bila Travnik. Dugovanja Kupca Lančanik d.o.o. Kakanj prema analitičkom bruto bilansu iznose 118.947,91 KM i ona datiraju iz 2019 godine, a u Izjavi koju je dobio od direktora dana 30.06.2025.godine, direktor društva se izjasnio da nema otvorenih ne isplaćenih potraživanja od iste i naglasio je da je ta firma ugašena, a potraživanja zastarjela. Za preostale kupce na kontu 211 je utvrdio da postoje i obaveze prema tim dobavljačima, tako da nisu rađene kompenzacije/prebijanje potraživanja i obaveza. Nadalje je istakao u vezi ostalih kratkoročnih potraživanja na kontu 2388 evidentirana su potraživanja prema direktoru Arminu Pačarizu u iznosu od 572.521,26 KM. Detaljnim pregledom Zapisnika o inspeksijskom nadzoru društva MMF od strane Porezne uprave FBIH-KPU Zenica, broj 13-4-02-12-20-74/22 od 12.04.2022.godine, na stranici 9/41 konstatovano je slijedeće: „Uvidom u analitičke kartice glavne knjige i izvode sa transakcijskog računa za kontrolisani period, utvrđeno je da kontrolisani obveznik na kontu 2388-Ostala kratkoročna potraživanja evidentirao potraživanja od odgovornog lica Armina Pačariza. Kratkoročna potraživanja su evidentirana u glavnoj knjizi knjiženjem isplata po izvodima sa transakcijskog računa sa opisom na izvodu Armin Pačariz koristeći biznis karticu. Korištenje biznis kartice je ograničeno na poslovnu potrošnju koju je potrebno potkrijepiti odgovarajućom dokumentacijom. Do završetka kontrole, inspektorima nije predložena dokumentacija koja dokazuje poslovnu potrošnju, niti je predložen Ugovor o pozajmici. Odgovorno lice

Armin Pačarić od 30.04.2020.godine nije u radnom odnosu kod kontrolisanog obveznika. Obzirom da postupajućim inspektorima nisu dokumentirane navedene isplate, iste se smatraju dohotkom od nesamostalne djelatnosti.“ Dakle, kao što se vidi i iz zapisnika na iznos od 572.521,26 KM ostalih kratkoročnih potraživanja od Armina Pačarića, Inspektori Porezne uprave FBIH-KPU Zenica su obračunali poreze i doprinose kao i zatezne kamate u zbirnom iznosu od 655.504,49 KM, jer društvo MMF d.o.o. Kakanj nije opravdalo ta sredstva. U izjavi koju mu je dostavio MMF d.o.o. Kakanj dana 30.06.2025.godine direktor je izjavio sljedeće (Stav 3 Izjave): „Što se tiče podizanja sredstava u visini 572.521,26 KM biznis karticom na ime Armin Pačarić, odnosno MMF d.o.o. Kakanj tim sredstvima smo kupovali i ulagali u repromaterijal i plaćali radnu snagu po potrebi“. Nadalje je istakao da je detaljnim pregledom analitičkog bruto bilanca utvrdio da su bila i računovodstveno evidentirana sredstva na kontu 2050 Blagajna u iznosu od 30.820,00 KM, što predstavlja dio imovine društva. Međutim pregledom Zapisnika o inspekcijskom nadzoru društva MMF od strane Porezne uprave FBIH-KPU Zenica broj 13-4-02-12-20-74/22 od 12.04.2022.godine, na stranici 11/41 i 12/41 od strane poreskih inspektora konstatovano je sljedeće: „S obzirom da kontrolisani obveznik u toku inspekcijskog nadzora, postupajućim inspektorima nije dao na uvid blagajničku dokumentaciju niti je prezentirao i izbrojao gotovinu u blagajnu u iznosu od 30.820,00 KM, utvrđeno je da istu ne posjeduje i da se ne zna u koju svrhu je utrošena. Navedeni iznos gotovine se smatra prihodom od nesamostalne djelatnosti odgovornog lica Armin Pačarić“, a što se vidi i iz zapisnika na iznos od 30.820,00 KM-sredstva u blagajni društva MMF d.o.o. Kakanj. Inspektori Porezne uprave FBIH-KPU Zenica su obračunali poreze i doprinose kao i zatezne kamate u zbirnom iznosu od 32.683,71 KM jer društvo MMF d.o.o. Kakanj nije raspolagalo novčanim sredstvima.

Privremeni stečajni upravitelj na osnovu navedenog je zaključio da privredno društvo MMF d.o.o. Kakanj ne posjeduje dovoljno imovine potrebne za pokriće troškova stečajnog postupka, da postoji razlog za otvaranje stečajnog postupka, da je prijedlog dopušten i osnovan, da se poslovanje privrednog društva ne može nastaviti i kako stečajni dužnik nema imovine, pa ni za troškove stečajnog postupka, pa predlažem da Sud pozove povjerioci i zainteresirane osobe da predujme novčani iznos od 6.000,00 KM za obezbjeđenje troškova stečajnog postupka u roku koji Sud odredi, a u suprotnom ukoliko niko od povjerilaca ne predujmi navedene troškove predlaže otvaranje i istovremeno zaključenje stečaja.

Kako je u toku postupka utvrđeno da stečajni dužnik ima obaveze, a nema dovoljno imovine, pa ni za troškove stečajnog postupka, to je sud primjenom odredbe člana 102 st. 7 i 8. Zakona o stečaju („Službene novine F BiH”, broj: 53/21) pozvao povjerioci i zainteresirana lica da uplate predujam za obezbjeđenje troškova stečajnog postupka. Visina troškova srazmjerno je određena troškovima stečajnog postupka koji su od strane privremenog stečajnog upravitelja procijenjeni na iznos od 6.000,00 KM.

Slijedom navedenog odlučeno je kao u izreci ovog rješenja primjenom odredbe člana 196. st. 3 Zakona o stečaju, a ovim rješenjem povjerioci i zainteresirana lica su upozorena na posljedice propuštanja postupanja po pozivu ovog suda.

POUKA O PRAVNOM LIJEKU:
Protiv ovog rješenja nije
dozvoljena žalba.

Stečajni sudija:
Amela Sinanović